



ЎЗБЕКИСТОН РЕСПУБЛИКАСИ КОРРУПЦИЯГА  
ҚАРШИ КУРАШИШ АГЕНТЛИГИ ДИРЕКТОРИНИНГ  
БҮЙРУГИ

Давлат фуқаролик хизматчиси томонидан хизмат сафарлари, халқаро ва бошқа расмий тадбирлар муносабати билан олиниши мумкин бўлган совға қиймати, шунингдек уни тасарруф этиш тартиби тўғрисидаги низомни тасдиқлаш ҳакида

Ўзбекистон Республикасининг “Давлат фуқаролик хизмати тўғрисида”ги Қонунининг 18-моддасига мувофиқ **буораман:**

1. Давлат фуқаролик хизматчиси томонидан хизмат сафарлари, халқаро ва бошқа расмий тадбирлар муносабати билан олиниши мумкин бўлган совға қиймати, шунингдек уни тасарруф этиш тартиби тўғрисидаги низом иловага мувофиқ тасдиқлансан.
2. Мазкур буйруқ Ўзбекистон Республикаси Президенти ҳузуридаги Давлат хизматини ривожлантириш агентлиги, Ўзбекистон Республикаси Камбағалликни қисқартириш ва бандлик вазирлиги ҳамда Ўзбекистон Касаба уюшмалари Федерацияси билан келишилган.
3. Ушбу буйруқ расмий эълон қилинган кундан эътиборан кучга киради.

Директор



Burxanov A. E.

Тошкент ш.  
2023 йил 11 март,  
54-сон

Келишилди:

**Ўзбекистон касаба уюшмалари**  
**Федерацияси раиси**



**Рафиков К.М.**

Тошкент ш.  
2023 йил 07 март,

**Директорнинг биринчи  
ўринбосари**



**Xasanov A. A.**

Тошкент ш.  
2023 йил 09 март,

**Vazir**



**Musayev B. A.**

Тошкент ш.  
2023 йил 10 март,

Ўзбекистон Республикаси Коррупцияга қарши  
курашиб агентлиги директорининг

2023 йил 11 марта 54-сон буйруғига

## ИЛОВА

**Давлат фуқаролик хизматчиси томонидан хизмат сафарлари, халқаро ва бошқа расмий тадбирлар муносабати билан олиниши мумкин бўлган совға қиймати, шунингдек уни тасарруф этиш тартиби тўғрисидаги**

## НИЗОМ

Мазкур Низом давлат фуқаролик хизматчиси томонидан хизмат сафарлари, халқаро ва бошқа расмий тадбирлар муносабати билан олиниши мумкин бўлган совға қиймати, шунингдек уни тасарруф этиш тартибини белгилайди.

### 1-боб. Умумий қоидалар

1. Давлат фуқаролик хизматчиси Ўзбекистон Республикаси худудидан ташқарида амалга ошириладиган хизмат сафарлари, халқаро ва бошқа расмий тадбирлар, шунингдек Ўзбекистон Республикаси худудида ўтказиладиган халқаро ва бошқа расмий тадбирлар (бундан буён матнда халқаро ва бошқа расмий тадбирлар деб юритилади) муносабати билан совға олиши мумкин.

Ўзбекистон Республикаси худудида ўтказиладиган халқаро ва бошқа расмий тадбирлар билан боғлиқ бўлмаган хизмат сафарлари муносабати билан давлат фуқаролик хизматчисининг совға олиши тақиқланади.

2. Мазкур Низомда қўйидаги асосий тушунчалардан фойдаланилади:

**давлат органи** – давлат фуқаролик хизмати татбиқ қилинадиган давлат органлари ва ташкилотлари рўйхатига киритилган давлат хокимият ваколатларига эга бўлган ташкилий жиҳатдан алоҳида тузилма;

**совға** – давлат фуқаролик хизматчисига халқаро ва бошқа расмий тадбирлар муносабати билан жисмоний ва юридик шахслар томонидан бепул тақдим этилган, моддий қимматга эга бўлган мол-мулк ёки беғараз кўрсатилган хизмат;

**халқаро тадбирлар** – давлат органи номидан, унинг расмий вакиллари ҳамда хорижий мамлакатлар ва халқаро ташкилотлар вакиллари иштирокида ўзаро ҳамкорлик муносабатларини ўрнатиш, алоқаларни ривожлантириш, тажриба алмашиш мақсадида ташкил этиладиган ва ўтказиладиган тадбирлар, хусусан Ўзбекистон Республикаси делегациясининг хорижий мамлакатга, хорижий мамлакат делегациясининг Ўзбекистон Республикасига ташрифи билан боғлиқ тадбирлар;

**расмий тадбирлар** – давлат органига юклатилган вазифа ва функциялардан келиб чиқиб, давлат органи номидан, унинг расмий вакиллари иштирокида ташкил этиладиган, муайян мақсадларга эришишга қаратилган тадбирлар (расмий қабул, маросим, учрашув, анжуман, семинар, брифинг, симпозиум, тақдимот, давра сухбати ва бошқа тадбирлар);

**хизмат сафари** – давлат органи раҳбарининг буйруғига (қарори, фармойишига) асосан давлат фуқаролик хизматчиси ўзининг доимий иш жойидан бошқа жойга (Ўзбекистон Республикаси худудида ёки унинг худудидан ташқари) хизмат вазифасини ва топширигини бажариш учун муайян муддатга юборилиши;

**совға берувчи** – халқаро ва бошқа расмий тадбирлар муносабати билан давлат фуқаролик хизматчисига совға тақдим этувчи жисмоний ёки юридик шахс вакили;

**Совғалар реестри** – давлат фуқаролик хизматчиси томонидан ҳалқаро ва бошқа расмий тадбирлар муносабати билан қабул қилинган совғалар тұғрисидаги маълумотлар рүйхати;

**мекмондүстлик белгиси** – ҳалқаро ва бошқа расмий тадбирлар муносабати билан икки томонлама алоқаларни мустаҳкамлаш ва этикет қоидаларига мувофиқ нонуштага, кофе-брейкка, тушликка, кечки овқатта ва оммавий-маданий ва концерт-томоша тадбирларига таклиф қилиш.

3. Мазкур Низом талабларига риоя этиш Давлат фуқаролик хизмати лавозимларининг давлат реестрига киритилган лавозимлардаги барча давлат фуқаролик хизматчилари учун мажбурийдир.

4. Давлат фуқаролик хизматчилари томонидан ўзларининг хизмат ваколатларини жисмоний ва юридик шахслар манфаатларини қўзлаб бажариш ёки бажармаслик эвазига улардан ҳар қандай совғалар олиш тақиқланади. Бундан давлат фуқаролик хизматчиси томонидан алоҳида хизматлари учун давлат органининг тегишли қарори асосида олинган совғалар, шунингдек мусобақалар ва танловларда эришган ютуклари, давлат байрамлари, нишонланадиган саналар ҳамда бошқа расмий тадбирлар муносабати билан мукофотлаш натижасида олинган совғалар мустасно.

5. Давлат фуқаролик хизматчиси ҳалқаро ва бошқа расмий тадбирлар муносабати билан ўзи ёки бошқа шахслар учун совға тақдим этилишини сўрашига ёки талаб қилишига йўл қўйилмайди.

6. Давлат фуқаролик хизматчисининг ҳалқаро ва бошқа расмий тадбирлар муносабати билан унинг оила аэзоларига тақдим этилган совға давлат фуқаролик хизматчисига берилган совға деб ҳисобланади.

7. Давлат органи раҳбарининг буйруғига (қарорига, фармойишига) асосан:

совғанинг қийматини аниқлаш ва уни сақлаш, Совғалар реестрини юритиш давлат органининг хўжалик бўлинмаси (бундан бўён матнда бўлинма деб юритилади) (ходими) томонидан;

совғани давлат органининг балансига кирим қилиш мазкур давлат органининг молия-иқтисод бўлинмаси (ходими) томонидан;

совғалар билан боғлиқ масалаларни назорат қилиш ва мувофиқлаштириш давлат органининг коррупцияга қарши курашиш бўлинмаси (ходими) томонидан амалга оширилади.

Бунда, давлат органида мазкур бандда назарда тутилган таркибий бўлинмалар (ходимлар) мавжуд бўлмаган тақдирда тегишли вазифа давлат органи раҳбарининг буйруғига (қарорига, фармойишига) асосан бошқа таркибий бўлинмага (ходимга) юқлатилиши мумкин.

## **2-боб. Ҳалқаро ва бошқа расмий тадбирлар муносабати билан тақдим этилган совғани қабул қилиш талаблари**

8. Давлат фуқаролик хизматчиси томонидан ҳалқаро ва бошқа расмий тадбирлар муносабати билан олиниши мумкин бўлган совға қўйидаги талабларга жавоб бериши лозим:

Ўзбекистон Республикаси қонунчилик хужжатлари, давлат органининг ички идоравий хужжатлари ҳамда ушбу Низом талабларига мувофиқ бўлиши;

совға уни берувчи томонидан аниқ бир ҳалқаро ва бошқа расмий тадбирлар муносабати билан ихтиёрий тақдим этилган бўлиши;

давлат фуқаролик хизматчиси томонидан очиқ ва ошкора қабул қилиниши;

давлат органининг обрўсига (нуфузига) путур етказмаслиги;

манбаатлар тўқнашуви ёки коррупциявий хавф-хатарларининг келиб чиқишига сабаб бўлмаслиги, хусусан давлат фуқаролик хизматчисининг хизмат фаолиятида холис қабул

килишига таъсир кўрсатадиган мажбуриятни юзага келтирмаслиги.

9. Давлат фуқаролик хизматчиси совғани қабул қилиш жараёнида совға берувчидан совғанинг қийматини тасдиқловчи ҳужжатларни (совғанинг қийматини тасдиқловчи савдо чекини ёки савдо квитанциясини ёхуд бошқа ҳужжатларни) сўраб олиши мумкин.

10. Давлат фуқаролик хизматчисига тақдим этилган тез яроқсиз ҳолга келувчи маҳсулотлар (табиий гулдаста, доналик шириналлар), шунингдек канцелярия тўпламлари (тақвим, буклет, пластмассали ручка, кундалик ва блокнот) совға сифатида расмийлаштирилмайди ҳамда ушбу совғалар давлат фуқаролик хизматчиси томонидан ўз ҳоҳишига кўра тасарруф этилади.

11. Давлат фуқаролик хизматчиси унга ҳалқаро ва бошқа расмий тадбирлар муносабати билан меҳмондўстлик белгиси сифатида билдирилган таклифни қабул қилиши мумкин.

Бунда, давлат фуқаролик хизматчиси меҳмондўстлик белгиси сифатида билдирилган таклифнинг бегаразлигига шубҳа сезган тақдирда, ушбу таклифни дарҳол рад этиши ва алоқа воситалари орқали бу ҳақда коррупцияга қарши курашиш бўлинмасини огохлантириши шарт.

### **3-боб. Ҳалқаро ва бошқа расмий тадбирлар муносабати билан тақдим этилган совғанинг қиймати ва уни тасарруф этиш**

12. Давлат фуқаролик хизматчиси ҳалқаро ва бошқа расмий тадбирлар муносабати билан унга тақдим этилган совғани ушбу тадбирлардан қайтиб келган кундан бошлаб уч иш куни ичида бўлинмага совғанинг қийматини тасдиқловчи тегишли ҳужжатлар (совғанинг қийматини тасдиқловчи савдо чеки ёки савдо квитанцияси ёхуд бошқа ҳужжатлар) мавжуд бўлса, ушбу ҳужжатлар билан бирга тақдим этади, бундан мазкур Низомнинг 10-бандида назарда тутилган совғалар мустасно.

13. Давлат фуқаролик хизматчиси томонидан совғани бўлинмага топширилиши тўғрисидаги топшириш ва қабул қилиш далолатномаси (бундан буён матнда далолатнома деб юритилади) расмийлаштирилгунга қадар совғанинг бутлиги ва сақланиши учун жавобгарлик давлат фуқаролик хизматчиси зиммасида бўлади.

14. Давлат фуқаролик хизматчиси томонидан бўлинмага топширилган ҳар қандай совға бўйича далолатнома ушбу бўлинма томонидан икки нусхада тузилади. Бунда, бўлинма томонидан ушбу далолатноманинг биринчи нусхаси мазкур Низомнинг иловасига мувофиқ шаклдаги Совғалар реестрида совғани рўйхатга олган ҳолда давлат фуқаролик хизматчисига қайтарилади, иккинчи нусхаси ушбу бўлинмада сақланади.

15. Давлат фуқаролик хизматчисида совғанинг қийматини тасдиқловчи ҳужжат мавжуд бўлмаса, бўлинма томонидан совғанинг қиймати аниқланади.

Бунда, бўлинма томонидан совғанинг бозор нархи савдо дўконлари, интернет ҳамда бошқа манбалар ва усуслар орқали ўрганилиб, унинг ўртacha қиймати аниқланади ва унинг натижаси бўйича баённома расмийлаштирилади.

16. Совғанинг қиймати базавий ҳисоблаш миқдорининг 4 (тўрт) бараварига teng ёки ундан кўп бўлмаган миқдорда эканлиги аниқланган тақдирда, совға давлат фуқаролик хизматчисида қолдирилади ва у томонидан ўз ихтиёрига кўра тасарруф этилади.

Бунда, бўлинма томонидан совғанинг давлат фуқаролик хизматчисига топширилганлиги бўйича далолатнома расмийлаштирилади.

Совғанинг қиймати базавий ҳисоблаш миқдорининг 4 (тўрт) бараваридан ортиклиги аниқланган тақдирда, совға молия-иқтисод бўлинмаси томонидан давлат органининг балансига кирим қилинади.

17. Давлат органининг балансига ўтказилган совгадан давлат органининг эҳтиёжи учун фойдаланишга рухсат этилади.

18. Давлат фуқаролик хизматчиси халқаро ва бошқа расмий тадбирлар муносабати билан ўзига тақдим этилган совғаларни қабул қилишнинг қонунийлиги тўғрисида ҳар қандай шубҳа пайдо бўлганда, шу заҳоти ушбу масала бўйича бевосита ўзининг юқори турувчи раҳбариятини ёки коррупцияга қарши курашиш бўлинмасини хабардор қилиши шарт.

Совғанинг кийматини тасдиқловчи хужжатларнинг ишончлилиги ва ҳақиқийлиги бўйича шубҳалар мавжуд бўлган тақдирда тақдим этилган хужжатларнинг ишончлилиги ва ҳақиқийлиги коррупцияга қарши курашиш бўлинмаси томонидан текширилиши мумкин.

19. Давлат фуқаролик хизматчисининг халқаро ва бошқа расмий тадбирлар муносабати билан унинг оила аъзоларига тақдим этилган совға мазкур бобга мувофиқ тасарруф этилади.

#### **4-боб. Якуний қоида**

20. Ушбу Низом талаблари бузилишида айбдор бўлган шахслар қонунчилик хужжатларида белгиланган тартибда жавобгар бўлади.

Давлат фуқаролик хизматчиси томонидан хизмат  
сафарлари, халқаро ва бошқа расмий тадбирлар  
муносабати билан олиниши мумкин бўлган совға  
қиймати, шунингдек уни тасарруф этиш тартиби  
тўғрисидаги низомга  
ИЛОВА

(давлат органи номи)

**Хизмат сафарлари, халқаро ва бошқа расмий тадбирлар муносабати билан давлат  
фуқаролик хизматчилари томонидан қабул қилинган совғалар бўйича**

**РЕЕСТР**

№	Давлат хизматчиси томонидан совға қабул қилинган сана	Совғани қабул қилган давлат хизматчисининг Ф.И.О ва лавозими	Совғанинг тавсифи	Совғанинг берилиш сабаби/ муносабати	Совға берувчининг маълумотлари*	Совғанинг киймати**	Совғанинг тасарруф этилиши***	Совғани топширган давлат хизматчисининг имзоси ва сана	Масъул ходимнинг имзоси ва сана
1	2	3	4	5	6	7	8	9	10
1.									
2.									
...									

Изоҳ:

\*хорижий мамлакат ва ташкилотнинг номи, совға берувчининг Ф.И.О ва лавозими;

\*\*совғанинг қийматини тасдиқловчи савдо чеки ёки савдо квитанцияси ёхуд бошқа хужжатлар мавжуд бўлса, шу асосида, агар мавжуд бўлмаса, совғанинг қийматини аниқлаш асосида тўлдирилади;

\*\*\*совганинг давлат фуқаролик хизматчиси тасарруфига ўтказилганлиги ёки давлат органига топширилганлиги тўғрисидаги маълумотлар ёзилади.